



14/02/2025



MES 8 25 0000190349

გადაწყვეტილება

შპს სულხან-საბა ორბელიანის უნივერსიტეტის „ბიზნესის ადმინისტრირების“ სამაგისტრო საგანმანათლებლო პროგრამის აკრედიტაციის შესახებ

1. გადაწყვეტილების მიღების სამართლებრივი საფუძვლები

1.1. „უმაღლესი განათლების შესახებ“ საქართველოს კანონის 66-ე მუხლის პირველი პუნქტის, „განათლების ხარისხის განვითარების შესახებ“ საქართველოს კანონის 22-ე მუხლის პირველი პუნქტისა და საქართველოს განათლებისა და მეცნიერების მინისტრის 2011 წლის 4 მაისის №65/ნ ბრძანებით დამტკიცებული „უმაღლესი საგანმანათლებლო დაწესებულებების საგანმანათლებლო პროგრამების აკრედიტაციის დებულების“ 27²-ე მუხლის პირველი პუნქტის მიხედვით, საგანმანათლებლო პროგრამების აკრედიტაციის საბჭო (შემდგომში - საბჭო) სააკრედიტაციო დოკუმენტაციის, აკრედიტაციის ექსპერტთა ჯგუფის დასკვნის, დაწესებულების მიერ აკრედიტაციის ექსპერტთა ჯგუფის დასკვნის პროექტზე წარმოდგენილი არგუმენტირებული პოზიციის შესწავლისა და ზეპირი მოსმენის გამართვის საფუძველზე იღებს გადაწყვეტილებას საგანმანათლებლო დაწესებულების საგანმანათლებლო პროგრამების აკრედიტაციის თაობაზე. აკრედიტაციის დებულების 27⁵-ე მუხლის მე-5 პუნქტის თანახმად, საბჭო ვალდებულია დაასაბუთოს მის მიერ მიღებული გადაწყვეტილება.

1.2. „განათლების ხარისხის განვითარების შესახებ“ საქართველოს კანონის 22-ე მუხლის მე-2 პუნქტის „ა“ ქვეპუნქტისა და აკრედიტაციის დებულების 27⁵ - ე მუხლის პირველი პუნქტის „ა“ ქვეპუნქტის შესაბამისად, საბჭო იღებს გადაწყვეტილებას საგანმანათლებლო პროგრამის აკრედიტაციის მინიჭების შესახებ, თუ „უმაღლესი განათლების შესახებ“ საქართველოს კანონის 66-ე მუხლის მე-4 პუნქტის, „განათლების ხარისხის განვითარების შესახებ“ საქართველოს კანონის 22-ე მუხლის მე-8 პუნქტისა და აკრედიტაციის დებულების 27⁶ - ე მუხლის პირველი პუნქტის „ა“ ქვეპუნქტის შესაბამისად, საგანმანათლებლო პროგრამის პირველი და ყოველი მომდევნო აკრედიტაციის შემთხვევაში, საგანმანათლებლო პროგრამა აკრედიტაციის სტანდარტებთან შესაბამისობის შეფასებისას, ყველა სტანდარტთან მიმართებით საბჭოს მიერ შეფასდა, როგორც „სრულად ან/და მეტწილად შესაბამისობაშია სტანდარტის მოთხოვნებთან“.

1.3. „აკრედიტაციის დებულების“ 27⁵-ე მუხლის მე-3 პუნქტის შესაბამისად, აკრედიტაციის მინიჭების შესახებ გადაწყვეტილების მიღების შემთხვევაში, საბჭო უფლებამოსილია აკრედიტაციის მაძიებელს მისცეს რეკომენდაციები.

1.4. „აკრედიტაციის დებულების“ 27⁶-ე მუხლის პირველი პუნქტის „ბ“ ქვეპუნქტის თანახმად, ერთ სტანდარტთან მიმართებით მაინც შეფასდა, როგორც „მეტწილად შესაბამისობაშია სტანდარტის მოთხოვნებთან“ და არცერთ სტანდარტთან მიმართებით არ შეფასდება, როგორც „ნაწილობრივ შესაბამისობაშია სტანდარტის მოთხოვნებთან ან „არ არის შესაბამისობაში სტანდარტის მოთხოვნებთან“, საბჭო იღებს გადაწყვეტილებას აკრედიტაციის შესახებ და დაწესებულებას განუსაზღვრავს ვადას მიღებული რეკომენდაციების შესრულების თაობაზე ანგარიშის წარსადგენად, რაც აისახება საბჭოს სხდომის ოქმში.

1.5. აკრედიტაციის დებულების 27⁵ - ე მუხლის მე-7¹ პუნქტის შესაბამისად, საბჭო უფლებამოსილია, დასაბუთებული არგუმენტაციის შემთხვევაში, განსაზღვროს გადაწყვეტილებების ძალაში შესვლის თარიღი.

2. აღწერილობითი ნაწილი და დასაბუთება

2.1. ვიზიტის ბრძანება (№912257, 26/07/2024).

2.2 საბჭომ შეისწავლა საგანმანათლებლო პროგრამის აკრედიტაციასთან დაკავშირებული დოკუმენტაცია, კერძოდ, თვითშეფასების ანგარიშსა და მასზე თანდართულ დოკუმენტაციაში ასახული ინფორმაცია, ექსპერტთა ჯგუფის დასკვნა, ექსპერტთა ჯგუფის დასკვნის პროექტზე აკრედიტაციის მადიებლის მიერ ცენტრისთვის წარმოდგენილი არგუმენტირებული პოზიცია.

2.3 სააკრედიტაციო განაცხადის, აკრედიტაციის ექსპერტთა ჯგუფის დასკვნისა და ექსპერტთა ჯგუფის დასკვნის პროექტზე აკრედიტაციის მადიებლის მიერ ცენტრისთვის წარმოდგენილი არგუმენტირებული პოზიციის, ასევე, სხდომაზე დაინტერესებული მხარის ზეპირი პოზიციის მოსმენის საფუძველზე, საბჭომ მეტწილად გაიზიარა ექსპერტთა დასკვნაში დაფიქსირებული შეფასება, კერძოდ:

ა) აკრედიტაციის საბჭომ 1.2 კომპონენტის კლასტერული რეკომენდაცია, "რეკომენდებულია აღიწეროს ყველა საგანმანათლებლო პროგრამის სწავლის შედეგები შემდეგი ქვეკატეგორიების გამოყენებით: "ცოდნა და გაცნობიერება - უნარი - პასუხისმგებლობა და ავტონომიურობა" გადაიტანა რჩევაში, თუმცა აღნიშნულ ცვლილებას არ გამოუწვევია კომპონენტის შეფასების ცვლილება. კლასტერული რეკომენდაციების გათვალისწინებით, საბჭომ 1.2 კომპონენტი შეაფასა, როგორც მეტწილად შეესაბამება მოთხოვნებს;

ბ) 1.5 კომპონენტის რეკომენდაცია - "სასურველია, გადაიხედოს კურიკულუმი ისეთი ფაქტორების გათვალისწინებით, როგორიცაა: კურსის მიზნები და სწავლის შედეგები; სასწავლო თემატიკა; დავალებების ინტენსივობა, მოცულობა და სირთულე; სასწავლო მასალის მოცულობა და სირთულე; სტუდენტის ცოდნის შეფასების მეთოდები" გადავიდა რჩევაში;

გ) აკრედიტაციის საბჭომ ამოიღო 1.5 კომპონენტის შემდეგი რეკომენდაცია - "რეკომენდებულია, გადაიხედოს პროგრამის სასწავლო კურსები დარგობრივი მახასიათებლით განსაზღვრულ ძირითად თემატიკასთან შესაბამისობის მიზნით";

დ) საბჭომ შეცვალა რეკომენდაცია 3.2 კომპონენტში და ჩამოყალიბდა შემდეგი სახით: "რეკომენდებულია სამაგისტრო პროგრამებში გაძლიერდეს სტუდენტების მიერ სამეცნიერო კვლევის ინსტრუმენტების გამოყენება და აკადემიური წერის უნარები."

3. სარეზოლუციო ნაწილი

„უმაღლესი განათლების შესახებ“ საქართველოს კანონის 66-ე მუხლის პირველი პუნქტის, მე-2 პუნქტის „ა“ ქვეპუნქტის, მე-3 და მე-4 პუნქტების, „განათლების ხარისხის განვითარების შესახებ“ საქართველოს კანონის 22-ე მუხლის პირველი პუნქტის, მე-2 პუნქტის „ა“ ქვეპუნქტის, მე-3 და მე-8 პუნქტების, აკრედიტაციის დებულების 27² -ე მუხლის პირველი პუნქტის, 27⁵ -ემუხლის პირველი პუნქტის „ა“ ქვეპუნქტისა და მე-5 პუნქტის, 27⁶ -ე მუხლის პირველი პუნქტის „ბ“ ქვეპუნქტის, „საჯარო სამართლის იურიდიული პირის - განათლების ხარისხის განვითარების ეროვნული ცენტრის საქმისწარმოების წესისა და შინაგანაწესის დამტკიცების შესახებ“ სსიპ - განათლების ხარისხის განვითარების ეროვნული ცენტრის დირექტორის 2011 წლის 01 ივნისის N223 ბრძანების მე-8 მუხლისა და საქართველოს ზოგადი ადმინისტრაციული კოდექსის 53-ე მუხლის შესაბამისად,

გადაწყვეტა:

1. დაკმაყოფილდეს შპს სულხან-საბა ორბელიანის უნივერსიტეტის მიერ წარმოდგენილი სააკრედიტაციო განაცხადი და დანართი №1-ით გათვალისწინებულ „ბიზნესის ადმინისტრირების“ სამაგისტრო საგანმანათლებლო პროგრამას მიენიჭოს აკრედიტაცია 7 წლის ვადით 2032 წლის 31 იანვრამდე.

1. ცნობილ იქნას აკრედიტაციის ექსპერტთა ჯგუფის დასკვნა "ბიზნესის ადმინისტრირების" საბაკალავრო, "ბიზნესის ადმინისტრირების" ინგლისურენოვანი საბაკალავრო, "საჯარო მმართველობის" საბაკალავრო, "ბიზნესის ადმინისტრირების" სამაგისტრო, "ადამიანური რესურსების მართვის" სამაგისტრო და "საჯარო მმართველობის" სამაგისტრო საგანმანათლებლო პროგრამების კლასტერის შესახებ ამ გადაწყვეტილების განუყოფელ ნაწილად (დანართი №2).

1. ცნობილ იქნას საბჭოს 2025 წლის 14 თებერვლის №169823 სხდომის ოქმის № 02 ნაწილი ამ გადაწყვეტილების განუყოფელ ნაწილად (დანართი №3).

4. დაწესებულებას საბჭომ შესასრულებლად განუსაზღვრა შემდეგი რეკომენდაციები და რჩევები:

კლასტერული რეკომენდაციები:

- რეკომენდებულია გამარტივდეს სწავლის შედეგების ფორმულირება და სტრუქტურა, რათა უზრუნველყოფილ იქნას თითოეული სწავლის შედეგის გაზომვადობა და ყოველი სწავლის შედეგი ფოკუსირებული იყოს ერთ ძირითად საკითხზე. (1.2)

ინდივიდუალური რეკომენდაციები:

- რეკომენდებულია კურსი "სტრატეგიული მენეჯმენტი და მენეჯმენტის თანამედროვე კონცეფციები" გაიყოს ორ სავალდებულო კურსად: "მენეჯმენტის თანამედროვე კონცეფციები" და "სტრატეგიული მენეჯმენტი", სადაც "მენეჯმენტის თანამედროვე კონცეფციები" იქნება "სტრატეგიული მენეჯმენტის" წინაპირობა; (1.5)
- რეკომენდებულია "სტრატეგიული მენეჯმენტისა და მენეჯმენტის თანამედროვე კონცეფციების" კურსიდან ამოღებულ იქნას თამაშთა თეორიასთან დაკავშირებული საკითხები და მის ნაცვლად შეიქმნას არჩევითი კურსი "თამაშთა თეორია მენეჯერებისთვის"; (1.5)
- რეკომენდებულია გადაიხედოს "პროექტის მენეჯმენტის" და "ღირებულებათა ჯაჭვის მენეჯმენტის" კურსების წინაპირობები, სადაც წინაპირობად განისაზღვროს კურსი "მენეჯმენტის თანამედროვე კონცეფციები"; (1.5)
- რეკომენდებულია სამაგისტრო პროგრამებში გაძლიერდეს სტუდენტების მიერ სამეცნიერო კვლევის ინსტრუმენტების გამოყენება და აკადემიური წერის უნარები. (3.2)

კლასტერული რჩევები პროგრამის განვითარებისთვის:

- სასურველია აღიწეროს ყველა საგანმანათლებლო პროგრამის სწავლის შედეგები შემდეგი ქვეკატეგორიების გამოყენებით: "ცოდნა და გაცნობიერება - უნარი - პასუხისმგებლობა და ავტონომიურობა"; (1.2)
- სასურველია, რომ სწავლის შედეგები ყოველთვის ფოკუსირებული იყოს სტუდენტის მიღწევებზე და არა თავად სწავლის პროცესზე; (1.2)
- მიუხედავად მდიდარი პრაქტიკული გამოცდილებისა, სასურველია, მოწვეული პერსონალის უმრავლესობა ფლობდეს დოქტორის ხარისხს; (4.1)
- ბოლო 5 წლის განმავლობაში განხორციელებული სამეცნიერო აქტივობების რაოდენობრივი მონაცემების მიხედვით, თანაფარდობა აქტივობების სრულ რაოდენობასა და პერსონალის სრულ რაოდენობას შორის აჩვენებს, რომ პერსონალი შეიძლება მეტად იყოს ჩართული სამეცნიერო აქტივობებში (სტატიები, კონფერენციები); (4.1)

- სასურველია, ბიბლიოთეკამ შექმნას სასწავლო მოდული სამეცნიერო ბაზების გამოყენების შესახებ და აქტიურად წახალისოს მისი გამოყენება სტუდენტებსა და სხვა დაინტერესებულ პირებს შორის, სწავლა-სწავლების ხარისხის მხარდაჭერის მიზნით; (4.4)
- სასურველია, იმ პროგრამებში, სადაც სტუდენტთა რაოდენობა არ არის მაღალი, დაინერგოს მონაცემთა შეგროვების თვისებრივი მდგომარეობა, რათა ინფორმაცია შეგროვდეს ინტერვიუებისა და ფოკუს ჯგუფების მეშვეობით. (5.3)

ინდივიდუალური რჩევები პროგრამის განვითარებისთვის:

- სასურველია, გადაიხედოს კურიკულუმი ისეთი ფაქტორების გათვალისწინებით, როგორიცაა: კურსის მიზნები და სწავლის შედეგები; სასწავლო თემატიკა; დავალებების ინტენსივობა, მოცულობა და სირთულე; სასწავლო მასალის მოცულობა და სირთულე; სტუდენტის ცოდნის შეფასების მეთოდები; (1.5)
- სასურველია მაგისტრანტებისთვის ისეთი შესაძლო სამაგისტრო ნაშრომის თემების შეთავაზება, რომლებიც თანამედროვე გლობალური გამოწვევების პირობებში აქტუალურია. თუმცა, ამავე დროს, მაგისტრანტს უნდა მიეცეთ ინიციატივის გამოჩენის შესაძლებლობა თემის არჩევისა და მისი სამეცნიერო ხელმძღვანელთან შეთანხმების პროცესში. (1.5)

4. საბჭოს აღნიშნული გადაწყვეტილება ძალაში შევიდეს 2025 წლის 31 იანვარს.

5. საბჭოს მიერ გაცემული რეკომენდაციების შესრულების შესახებ ანგარიშის წარმოდგენის ვადად განისაზღვროს ერთი წელი - 2026 წლის 31 იანვრამდე.

6. საბჭოს მიერ მიღებული გადაწყვეტილება, საქართველოს ზოგადი ადმინისტრაციული კოდექსის 180-ე მუხლის პირველი ნაწილისა და „განათლების ხარისხის განვითარების შესახებ“ საქართველოს კანონის 24¹ მუხლის პირველი პუნქტის შესაბამისად, საგანმანათლებლო დაწესებულების მიერ შეიძლება გასაჩივრდეს სააპელაციო საჩივრის სააპელაციო საბჭოში წარდგენის გზით შემდეგ მისამართზე: ქ. თბილისი, მ. ალექსიძის მე-2 შესახვევი №2, ან თბილისის საქალაქო სასამართლოს ადმინისტრაციულ საქმეთა კოლეგიაში სარჩელის შეტანის გზით შემდეგ მისამართზე: ქ. თბილისი, დავით აღმაშენებლის ხეივანი №64, აღნიშნული გადაწყვეტილებისა და მისი დასაბუთებითი ნაწილების (დანართი №1, დანართი №2, დანართი №3) კანონმდებლობის შესაბამისად დაწესებულებისთვის გაცნობის დღიდან, ერთი თვის ვადაში.

საგანმანათლებლო პროგრამების აკრედიტაციის საბჭო
მდივანი
ტეფნაძე დავით

დ. 07.06.23

საგანმანათლებლო პროგრამების აკრედიტაციის საბჭო
საბჭოს თავმჯდომარე
ლომინაძე თამარ

თ. ლომინაძე

